



Nuuk, 25. november 2015

Inatsisartut Suleriaasianni § 37 naapertorlugu Naalackersuisunut imaattumik apeqquteqarpunga.
(Inatsisartunut ilaasortaq Sara Olsvig, Inuit Ataqatigiit)

Apeqqutit:

- 1) Tunumi piterarnerup kingulliup illunik, angallatinik atortunillu allanik annertuumik aseruisimasup kinguneri tamakkiisumik qanoq ippat kikkunniillu misissorneqarpat?
- 2) Naalackersuisut qanoq iliuuseqarniarpat?
- 3) Innuttaasut eqqugaasut sumut naammattumillu saaffissaqarpat?
- 4) Innuttaasut illuminnik angallatiminnilluunniit aserortoortut qanoq ikiorserneqarsinnaappat?
- 5) Pinngortitami sakkortuumik ajunaarnersuartoqartitsisinnaasumillu pisoqartillugu kommunit Namminersorlutillu akornanni akisussaaffiit qanoq agguataarsimappat?
- 6) Piteqqami pineqartumi kommunep iliuuseqarfigisinnaanngisai Namminersorlutik Oqartussanik qanoq iliuuseqarfigineqassappat?

Tunngavilersuut:

Tasiilaq tunullu sineriaata ilaa sapaatip akunnerata aallartinnerani piteqqamik sakkortuumik eqqugaapput. Assini tusagassiorfinnut annguttuni takusinnaavarput angallatit arlallit anorimit aserorsimasut illullu arlallit qalii tingissimasut. Innuttaasunik ajoqusersimasunik qujanartumik maannamut tusagaqanngilagut neriuppugullu innuttaasut tamakkerlutik timikkut ajoqusersimanatik aniguisimassasut.

Nalunngilarpulli taama sakkortutigisumik anorersuartillugu inunnut sakkortuumik aamma sunniuteqartartoq paaserusupparpullu piterarnerup nalaani kingornalu innuttaasut naammattumik saaffissaqarsimanersut.

Aamma paaserusupparput illunik angallatinillu aserortoorsimasut sillimmaserneqarnikkut ajornartorsiuteqarsimagunik pisortanit naammattumik ikiorserneqarsinnaanissaminnut periarfissaqarnersut.

Naalackersuisunik apeqqutit piaartumik akineqarnissaat kissaatigaarput, kingusinnerpaamik ullut suliffiusut qulit qaangiutsinnagit.